

DOMINGU XXXII TEMPU KOMÚN – TINAN C

Tema

Liturjia domingu ne'e nian propoin mai ita reflesaun ida kona-ba ema nia moris nia rohan no garante katak moris ne'e la remata.

Iha *primeira leitura*, ita iha maun-alin na'in hitu nia sasin ne'ebé fó moris ba fiar, durante persegisaun Antíoco IV Epifanes hasoru ema judeu sira. Buat ne'ebé motiva, fó kbiit ba maun-alin na'in hotu ne'e atu enfrenta tortura no mate mak, presizamente, serteza katak Maromak rezerva moris rohan-laek ba sira ne'ebé, iha mundu ne'e la'o ho fidelidade iha Ninia dalan sira.

Iha *Evanjellu*, Jezús garante katak resurreisaun mak realidade ne'ebé hein ita. Ita-nia ezisténsia moris-hi'as nian mak ezisténsia ida nakonu, totál, foun. Forma oinsá buat ne'e sei akontese mak mistériu ida; maibé resurreisaun mak serteza absoluta iha ema fiar-na'in ninia orizonte.

Iha *segunda leitura* ita simu konvite ida atu mantein diálogu no komuñau ho Maromak, enkuantu hein Kristu ne'ebé sei mai ba dala rua no moris foun ne'ebé Maromak rezerva mai ita. Ho orasaun de'it mak ita bele mantein fiél ba Evanjellu no soi korajen atu haklaken ba ema hotu Liafoun Di'ak salvasaun nian.

LEITURA I – 2 Mac 7,1-2.9-14

Iha 323 mK, Alexandre Magno mate no ninia jenerál sira fahe impériu ba malu. Palestina (husi 333 mK, integra iha impériu Alexandre nian) fofoun hela iha Ptolomeu sira nia liman (ne'ebé domina Ejitu no Fenícia). Husi tinan 200, Palestina pasa ba Seléusida sira nia liman (família seluk jenerál sira Alexandre nian, ne'ebé domina Síria no Mesopotámia).

Ptolomeu sira iha atitude toleránsia nian ho judaizmu no baibain respeita Maromak nia Povu nia tradisaun; maibé iha autoridade Seleúsida nia okos, elenizmu sai agresivu hodi ameasa judaizmu nia moris. Liuliu iha Antíoco IV Epifanes (175-164 mK) nia ukun mak nia impoin elenizmu hodi uza forsa mós. Ema judeu barak ne'ebé fiél ba sira-nia tradisaun hetan persegisaun no mate.

Testu ne'ebé ohin propoin mai ita koloka ita iha ambiente ida-ne'e. Nia haktuir inan ida no nia oan na'in hitu nia martíriu, ne'ebé lakohi viola fiar no tradisaun judaika sira no hetan mate.

MENSAJEN

Istória apresenta mai ita família ida maun-alin na'in hitu no sira-nia inan, ne'ebé liurai obriga ho tortura atu husik sira-nia fiar no han na'an fahi (ne'ebé Lei bandu tanba ba sira fahi mak balada “foer” ida). Testu haktuir mai ita resposta ne'ebé maun-alin sira ho barani fó, hodi preokupa liuliu ho fidelidade ba valór judaiku sira no bei-ala sira-nia fiar duké liurai nia ameasa sira.

Sá loos mak fó korajen ba foin-sa'e sira-ne'e? Tuir autór sira nia esplikasaun, fiar iha moris-hi'as/resurreisaun mak sai motivasaun ba sira (vers. 9). Maun-alin na'in hitu aten-barani atu defende fiar to'o mate, tanba sira fiar katak Maromak sei fó fila moris, moris ida hanesan ho ida ne'ebé hasai tiha husi sira. Maromak kriador, tuir katekeze ne'ebé ita rona, iha kbiit atu halo mártire sira moris hi'as fali ba moris rohan-laek...

Konseitu resurreisaun Testamentu Tuan nian la'ós ida Testamentu Foun nian; maibé ideia moris-hi'as ida iha mundu seluk hanesan ho ida ne'ebé ema hadau tiha. Ne'e mak ideia imortalidade nian. Iha testu ne'e formula de'it katak ema justu de'it mak sei hetan moris hi'as fali (vers. 14).

Ne'e mak ba dala uluk hatudu doutrina resurreisaun nian iha Bíblia. Husi ne'e mak sei dezentolve ideia ne'e to'o hetan naroman ho Jezús nia moris rasik.

LEITURA II – 2 Tes 2,16-3,5

Ita hatene ona katak Surat Daruak bá ema Tessalónica nian lori ita ba comunidade sarani ida nakonu ho fervór, no moris iha empenhu no laran-luak sira-nia kompromisu sarani, maski iha provasaun sira, nune'e sai modelu ba comunidade viziña sira (kf. 1 Tes 1,7-8); maibé comunidade ne'e mós iha dúvida no preokupasaun ruma kona-ba doutrina – katak ida “Na'i nia loron”, eh Jezús nia fila hikas ba dala rua. Paulo aproveita okaziaun atu korrije komportamentu sira, hato'o pedidu ruma no ezorta sarani sira ba fidelidade ida boot ba beibeik ba Jezús nia Evanjellu.

MENSAJEN

Aprezenta tiha doutrina kona-ba Na'i nia fila hikas ba dala rua (2,1-12), autór konvida sarani Tessalónica nian atu asume atitude loos, enkuantu hein Na'i, katak sai fiél ba Jezús nia Evanjellu ne'ebé apóstolu rasik tranzmite ba sira (2,13-15).

Konvite atu mantein fiél ba tradisaun sira akompaña ho hamulak ba Maromak Aman no Jezús Kristu, atu halo fidelidade sai posivel (2,16-17). Iha prosesu salvasaun nian iha planu rua: Maromak nia don no esforsu fidelidade nian husi ema nia parte. Lahó Maromak nia grasa ema nia esforsu la folin buat ida.

Iha parte daruak testu nian (3,1-5), ita haree pedidu ida orasaun nian ba apóstolu no ninia ministériu. Autór nia hamulak ba destinatáriu surat nian (2,16-17), tenke korresponde ho destinatáriu surat ne'e nian nia hamulak ba apóstolu. Orasaun ba malu mak forma ida folin liu solidariedade sarani nian.

Sarani sira simu ona Liafuan transformadora no libertadora Jezús nian nune'e tenke husu tulun husi Maromak atu proposta salvasaun ne'ebé Kristu lori mai, no Igreja hetan knaar atu sasin, to'o ba ema hotu, liuliu iha sirkunstánsia sira ne'ebé kontra proklamasan no moris tuir Evanjellu. Iha ne'e mós ita haree papél sentrál Maromak nian: autór surat nian hatene katak, lahó Maromak nia tulun, imposivel ba apóstolu atu fó sasin.

EVANJELLU – Lc 20,27-38

Testu ne'e situa ita iha Jerusalém, iha loron ikus sira molok Jezús mate. Ne'e mak altura kontrovérsia boot ho líder judaiku sira. Líder judaiku sira rejeita Jezús nia proposta: ida-ne'e mak ikus mai lori Jezús ba terus no mate iha krús.

Iha Evanjellu domingu ohin, Jezús nia inimigu sira mak saduseu sira. Iha Jezús nia tempu, saduseu sira forma grupu aristokrátiku, rekruta husi amlulik sira klase supeiór nian. Sira ezerse sira-nia autoridade iha Templu no domina Sinédriu (maski nune'e sira-nia autoridade iha instituisaun ne'e la'ós absoluta basá iha mós farizeu sira). Sira iha importánsia polítika, maski prokuradór romanu nia prezensa limita sira. Husi parte polítika sira komprende malu ho opresór romanu, no sira konservadór... Sira hakarak mantein situasaun atu keta lakon benefísiu polítiku, sosiál no ekonómiku ne'ebé sira hetan.

Ba saduseu sira, buat ne'ebé importante mak Lei eskrita eh ne'ebé hakerek – “Torah”. Sira nega katak Lei orál (esensiál ba farizeu sira) iha valór ruma. Apegu konservadór ba Lei eskrita esplika tansá sira nega fiar no doutrina ruma ne'ebé ambiente populár farizeu sira-nian admite, Tanba ne'e, sira la aseita mate sira nia moris-hi'as: la iha versíkulu ida iha “Torah” mak apoia fiar ne'e.

Iha konfliktu ho farizeu sira, iha nia kotuk iha vizaun ida sosiedade no podér nian. Saduseu sira la haree ho matan di'ak “demokratizasaun” Lei ne'ebé farizeu no sira-nia eskriba promove. Demokratizasaun ne'e apresenta inkonveniente atu halo amlulik sira lakon sira-nia autoridade nu'udar intérprete sira Lei nian. Iha povu nia oin, saduseu sira hatudu an nu'udar ema distante, severu, no ema ida la bele kona.

MENSAJEN

Kestaun sentrá ita-nia testu nian hale'u resurreisaun eh moris-hi'as, tema ida ne'ebé la iha signifikadu ida ba saduseu sira. Haree katak Jezús nia perspetiva besik ho ida farizeu sira-nian, saduseu sira apresenta ipóteze akadémika ida, ho objetivu atu ridikuliza fiar iha moris-hi'as: feto ida kaben, ho maun-alin na'in hitu, hodi kumpre lei ne'ebé dehan katak matebian ne'ebé mate lahó oan, nia alin tenke kaben ho faluk atu fó oan ba matebian nune'e impede atu soin sira monu iha ema seluk nia liman (kf. Dt 25,5-10). Bainhira moris hi'as, feto ne'e sé loos ninia feen?

Parte dahuluk Jezús nia resposta nian (vers. 27-36) afirma katak moris-hi'as la'ós (hanesan farizeu sira tempu ne'ebá nian hanoin) kontinuasaun simples moris iha mundu ne'e, maibé moris foun no distintu/oinseluk, moris nakonu ne'ebé ita labele komprende hodi hateke ho matan realidade moris loroloron nian. Nune'e kestaun kazamentu nian la vale (liafuan “hanesan anju sira” vers.30 nian la'ós espresaun atu hatuu valór kazamentu nian, maibé afirmasaun katak iha moris foun ne'e, iha preokupasaun ida de'it, katak, serví no hahi'i Maromak). Maromak nia kbiit, ne'ebé bolu ema husi mate ba moris, transforma no asume ema nia an tomak, nune'e ita moris ba moris foun ida iha ne'ebé ema nia potencialidade hotu hetan nia realizasaun tomak. Ita-nia kapasidade komprensaun kona-ba realidade ne'e iha ninia limitasaun, basá ita haree tuir roman rai ninian, enkuantu moris-hi'as ne'ebé hein ita hakat liu realidade rai nian.

Parte daruak Jezús nia resposta nian (vers. 37-38) mak afirmasaun ida kona-ba serteza resurreisaun/moris-hi'as nian. Tanba Nia la bele foti apoiu husi testu ikus Eskritura nian (hanesan Dn 12,2-3), ne'ebé ko'alia kona-ba fiar iha moris-hi'as (basá testu sira-ne'e la iha folin ba saduseu sira), Jezús sita ba sira “Torah” (kf. Ex 3,6): iha epizódiu ai-hun ne'ebé lakan, Jahwéh hatudu An ba Moisés nu'udar “Abraaun nia Maromak, Isaac nia Maromak no Jacob nia Maromak”... Se Maromak apresenta An ho forma ne'e – tinan barak liutiha Abraaun, Isaac no Jacob lakon husi rai ne'e – ne'e katak bei-ala patriarka sira ne'e la mate (ema ida ne'ebé “mate” – katak ema ida ne'ebé lakon moris iha nakukun “sheol” nian, tuir ideia semita korrente – nia lakon Maromak nia protesaun, basá nia la eziste ona nu'udar ema ne'ebé moris no konxiente). Iha perspetiva Jezús nian, bei-ala patriarka sira la tama iha estadu nakukun absolutu “sheol” nian, maibé oras-ne'e moris iha Maromak. Konkluzau: se Abraaun, Isaac no Jacob moris, ita bele ko'alia kona-ba resurreisaun/moris-hi'as.